

საზოგადო საქმეები.

ე რ ო ბ ა

(3 E M C T B O),

მისი დანიშნულება და წესდება

ნ. ნიკოლაძისა.

გამოცემული

ზ. ჭიჭინაძისაგან.

თბილისი, 1882.

ა. დრევიჩის და არ. კალანდაძის სტამბა, ლორ.-მელიქოვის ქუჩ.

I.

სოფელი, მაზრა და სახელმწიფო.

ყოველი სახელმწიფო შემდგარია სხვა და სხვა ნაწილებიდან, რომელთაც საზოგადოთ მაზრებს ეძახიან და ეს მაზრები, მათი მხრით, სოფლებიდან არიან შემდგარნი, რომელთაც სხვა-და-სხვა ოჯახების კრება შეადგენს. სოფელში თითოეულ ოჯახს თავისი საკუთარი საჭიროება აქვს, თავისი ადგილ-მამული, თავისი საქმე, შემოსავალი და ხარჯი. ამ ხარჯს გარდა, ყველა ოჯახებს, რომელნიც კი სოფელს შეადგენენ, აწევს კისერზე მთელი სოფლის საჭიროება: ამ ოჯახებმა უნდა იზრუნონ სოფლის საერთო საქმეებზე, უნდა მოაგროვონ და დახარჯონ საერთო ხარჯი, ერთათ უნდა მმართონ მთელი სოფლის საქმეები. ხშირათ თვითონ სოფელსაც აქვს თავისი საკუთარი, ესე იგი, ყველა კერძო ოჯახების საზოგა-

დო ადგილ-მამული, ტყე, სათიბი და სხვ. რომლის შემოსავალი და გამგეობა მთელ სოფელს ეკუთვნის. ამის მსგავსათ მაზრას, ესე იგი რამდენიმე სოფლების კრებას, აქვს თავისი საკუთარი საქმეები, მამულები, საჭიროება და ხარჯი, რომელიც საზოგადოა ყველა იმ სოფლების, რომელნიც ამ მაზრას შეადგენენ.

– 4 –

ამისვე მსგავსათ მთელ სახელმწიფოს, რომელიც შემდგარია რამდენიმე მაზრის კრებიდან, თავისი საკუთარი საჭიროება, მამულები და საქმეები აქვს, რომელნიც ეგრეთვე საზოგადო არიან ყველა კერძო მაზრების, რომლებიდანაც შემდგარია მთელი სახელმწიფო.

თანახმად ამ განყოფილებისა, ყოველ სახელმწიფოში საზოგადო გამგეობა იყოფა სამ ნაწილათ:

1) სოფლის (და მის მსგავსათ ქალაქის) გამგეობა, რომლის დანიშნულება მდგომარეობს სოფლის საქმეების მმართვეაში, სოფლის შემოსავლის შეკრებაში და მისი საჭიროების დაკმაყოფილებაში;

2) მაზრის (გუბერნიის და უეზდის) გამგეობა, რომელიც ყურს უგდებს სოფლების გამგეობებს და თან იმ საქმეებს მმართვეს, რომელნიც შეეხებიან საზოგადო. ყველა ამ მაზრის სოფლებს, ან რამოდენიმე იმათგანს;

3) სახელმწიფო გამგეობა, რომელიც ზედამხედველობს მაზრების გამგეობებზე, და იმას გარდა ყურს უგდებს და მმართვეს იმ საქმეებს, რომელნიც შეეხებიან საზოგადოთ ყველა ამ სახელმწიფოს მაზრებს ან რამოდენიმეს იმათგანს.

სხვა-და-სხვა სახელმწიფოებში ეს გამგეობები სხვა-და-სხვა ნაირათ არიან გამართული, სხვა და სხვა გვარ უფროსების ან ამორჩეულ პირების ხელში არიან, მაგრამ ყველგან კი საზოგადო გამგეობა მტკიცეთ განსა-

– 5 –

ზღვრული და განყოფილია ამ სამ ნაწილათ, ესე იგი სოფლის, მაზრის და სახელმწიფო გამგეობათ.

II.

ძველი და ახალი წესი გამგეობისა რუსეთში.

ამ უკანასკნელ დრომდი რუსეთში ეს სამივე გამგეობა ერთ და იმავე კალაპოტზე იყო გამოწყობილი. სახელ-

მწიფო გამგეობა ეკუთვნოდა, როგორც ეხლა ეკუთვნის ხელმწიფე იმპერატორს; მაზრის გამგეობა ეხარა მისგან დაყენებულ გუბერნატორებს და სოფლის გამგეობა გუბერნატორისგან დანიშნულ ჩინოვნიკებს. სოფლებში ეს ჩინოვნიკები თავიანთ შეხედულებისამებრ მმართვედნენ სოფლის საქმეებს, და პასუხს უგებდნენ მხოლოდ გუბერნატორებს; მაზრებში გუბერნატორები მმართვედნენ აგრეთვე თავიანთი შეხედულებისამებრ და აგრეთვე ეკითხებოდნენ და პასუხს აძლევდნენ მხოლოდ უმაღლეს მთავრობას... არც სოფლებს, არც მაზრებს არავინ ეკითხებოდა მათი საქმეების მმართვეაში, და იმათ არაფერი უფლება არ ჰქონდათ თავიანთი აზრის, მხედველობის, საჭიროების და სურვილის გამოსათქმელათ. მიღებული იყო, რომ სოფლების, მაზრების და საზოგადოთ მათი მცხოვრებლების მაგიერ ფიქრობდნენ, მოქმედებდნენ და

– 6 –

ზრუნავდნენ დაყენებული ჩინოვნიკები, რომელნიც თავიანთ თავს მამებათ რაცხავდნენ, და – როგორც მამები – არაფერ რჩევას არ ჰკითხავდნენ და ანგარიშს არ აძლევდნენ თავიანთ მორჩილ შვილებს, ან უფრო სწორეთ ვსთქვათ გერებს...

ღვთის მადლით, ამ უკანასკნელ დროს ეს მდგომარეობა საუკეთესოთ შეიცვალა. როგორც ნათქვამია 1 იანვრის 1864-ის უკაზში, ხელმწიფე იმპერატორმა «საჭიროთ სცნო მიეწოდა ადგილობრივი მცხოვრებლები, მათგან აღრჩეული პირების საშუალებით სამართველოთ თითოეული გუბერნიის და უეზდის საქმეებისა, რომელნიც შეეხებიან ადგილობრივ საჭიროებას და სარგებლობას» და ამ მიზნით სოფლის გამგეობა გარდაეცა სოფლის მცხოვრებლებისაგან აღმორჩეულ მამასახლისებს, მსაჯულებს და კეთილ-სინდისიანებს, და მაზრის გამგეობა – მაზრის მცხოვრებლებისგან აღრჩეულ დეპუტატების კრებას, რომელსაც ჰქვია ერობის კრება. – (Земское Собрание).

ხელმწიფე იმპერატორისგან დამტკიცებულ 1 იანვრის 1864 წ. სახელმწიფო რჩევის აზრში იპოვება ერთი მუხლი, მესამე, რომელშიაც ნათქვამია, რომ შინაგანი საქმეების მინისტრმა უნდა შეკრიბოს ცნობა, ადგილობრივი მთავრობის გამოკითხვით, თუ რა გზით და წესით შეიძლება «ერობის წესდების» გამოყენება იმ მაზრებში, რომელნიც განსაკუთრებითი წესით იმართვიან

– 7 –

(ესე იგი პოლშაში, ფინლანდიაში, ციმბირში და ჩვენში), და წარუდგინოს ხელმწიფე იმპერატორს თავისი აზრი ამ საგანზე. – მაშასადამე ჩვენ შეგვიძლიან იმედი

ვიქონიოთ, რომ ადრე თუ გვიან ჩვენც გველირება ეს ბედნიერება; ამისგამო, და ზოგი სხვა მიზეზითაც, ჩვენ საჭიროთ ვრაცხთ გავაცნოთ ჩვენი მკითხველები «ერობის წესდებას», მის დანიშნულებას, ხასიათს, საჭიროებას და სარგებლობას. რასაკვირველია, რომ ამ შემთხვევაში ჩვენ აქ არც იმის გამოკვლევას შეუდგებით, თუ რა იყო იმის მიზეზი, რომ ეს წესდება შემოიღეს რუსეთში, არც იმისას, თუ რა მხრით ეთანხმება ეს წესდება სამზღვარ-გარეთელი სახელმწიფოების წყობილებას, და რომლით არა, არც იმისას, თუ რა ნაკლულეევანება შეემჩნევა ამ წესდებას. ეს საგანი «ჩვენი საქმე არ არის» და არც საჭიროა ჯერ-ჯერობით მისი გამოკვლევა. ჩვენთვის ეხლა-ხანს აუცილებლათ საჭიროა და საკმაოც არის ცოდნა, თუ რაში მდგომარეობს ის წესდება, რომელიც რუსეთში მოქმედებს აგერ ექვსი წელიწადია, და რომელსაც იქ ეძახიან «ერობის წესდებას I იანვრის 1864 წლისა».

(Положение о земскихъ учрежденіяхъ 1-го января 1864 года). ამ წესდების გამოკვლევას და გამოკრებით თარგმნას შეუდგებით ჩვენ ეხლა.

მაგრამ, მინემ ჩვენ ამ საქმეს ხელს მოვკიდებთ, ცოტათი დაწვრილებით უნდა გავიხსენოთ, რა და რა საქმე ითვლება სახელმწიფო საქმეთ, და რა და რა სამაზროთ, საერობოთ.

– 8 –

III.

სახელმწიფო და სამაზრო საჭიროება და შემოსავალი.

სახელმწიფო არის კაცების კრება, შემდგარი მარტო იმისთვის კი არა, რომ მთავრებს მიუთვისებიათ ზოგიერთი უფლებები და დაუმორჩილებიათ ახლო-მახლო მცხოვრებლები და ხალხები. არა. ამ კრების საფუძველი, სიმაგრე და ნამდვილი, ბუნებითი მიმზიდველი ძალა ის სარგებლობაა, რომელსაც ჰპოებენ ერთათ შეყრილი პირები ერთმანეთის დაცვაში, დახმარებაში და ერთათ ცხოვრებაში. ყოველთვის და ყოველგან სახელმწიფოს მიზნათ ჰქონია ადვილათ დაიცვას და ადვილათ აცხოვროს ის პირები, რომლისგანაც თვითონ შემდგარია. ამის გამო, ის სახელმწიფო, რომელიც უფრო სინდისიანათ და ნამდვილათ, ხეირიანათ ასრულებს ამ თავის დანიშნულებას, ყოფილა უფრო ძლიერათ დამყარებული საზოგადო დახმარებაზე და სიყვარულზე, და ის სახელმწიფო კი, რომელსაც ეს მიზანი დაუვიწყნია, მიახლოვებულა თავის დაღუპვას, გადადგომია თავის მოვალეობას.

მაშასადამე, სახელმწიფოს აქვს მოვალეობა და ი ც ვ ა ს თ ა ვ ი ს ი წ ე ვ რ ე ბ ი, ესე იგი კერძო პირები,

და გაუადვილოს მათ ცხოვრება, ესე იგი მისცეს თვითეულს მათგანს ის, რისაც მოხერხება იმას თავისთავად ვერ შეუძლია. – როგორც წინეთ ნათქვა-

– 9 –

მი იყო, ეს მოვალეობა განყოფილია სამ ნაწილად: რისიც მოხერხება არ შეუძლია თითოეულ კერძო პირს, – მაგალითათ პატარა გზის ან ხიდის გაკეთება ერთ სოფლიდგან მეორემდე – იმას აკეთებს მთელი სოფელი ერთათ; და ამ ნაირათ რისიც გაკეთება და მოხერხება მთელ სოფელს შეუძლია, ის მის მოვალეობას შეადგენს, როგორც კერძო პირის მოვალეობაა ის, რისიც მოხერხება იმას თვითონ მარტო-ხელა ან თავის ოჯახის დახმარებით შეუძლია. – ამას გარდა არის ბევრი ისეთი საჭიროება, რომლის დაკმაყოფილებას ვერ ახერხებს ვერც მთელი სოფელი: მაგალითათ ავიღოთ ერთი ქალაქიდგან მეორემდე, ვთქვათ ქუთაისიდან თფილისამდე, გზის გაჭრა, ან ხეირიანი საავათმყოფოს ანა და სასწავლებლის გამართვა. ამ ნაირი საჭიროების დაკმაყოფილება არის მთელი მაზრის მოვალეობა, თუ ეს მაზრა იმოდენათ შემძლე და მოხერხებულა, რომ თავის თავათ შეუძლია ამ მოვალეობის შესრულება. და რისიც შესრულება და დაკმაყოფილება არ შეუძლია არც კერძო პირს, არც სოფელს, არც მაზრას, – იმ საჭიროების დაკმაყოფილება აწევს ვალათ სახელმწიფოს. ესე იგი ყველა მაზრების კრებას. ამ ნაირია, მაგალითათ, დიდი გზების გაყვანა, შუათანა და უმაღლესი სასწავლებლების გამართვა, სწავლის წინ-წაწევა, მაზრების გამაგრება და დაცვა მტრისგან, და სხვ. და სხვ. და სხვ.

რასაკვირველია, რომ ამ საჭიროების დაკმაყოფილებას

– 10 –

სჭირია საშუალება, ფული, შრომა და ძალა. ამისგამო სოფელი თავისი მხრით ჰკრებავეს ყველა კერძო პირებიდგან როგორც ფულს, ისე პიროვან შრომასაც, როცა სოფელს რაიმე საჭიროების დაკმაყოფილება სჭირდება. ამ ნაირათვე ჰკრებს ფულს და შრომას მაზრაც, ყველა სოფლებიდგან, იმ საჭიროების დასაკმაყოფილებლად, რომლებიც მაზრის საზრუნველი არიან და სახელმწიფო, თავის მხრით, ჰკრებს როგორც ფულს, ეგრეთვე პირად შრომას და ხალხსაც, იმ მოვალეობის ასავსებლათ, რომელსაც ადევს იმაზედ ყველა მაზრების საზოგადო საჭიროება. – თანახმად ამისა, გარდასახადიც სამ ნაირია:

1) სასოფლო, 2) სამაზრო (земскій сборъ) და 3) სახელმწიფო (сборъ на государственныя потребности).

იმ წესდებებით, რომელნიც გამოიცენ 1863-ში და 1

იანვარს 1864 წელსა, ადგილობრივ მცხოვრებლებს მიენიჭათ ნება თავიანთი სანდო პირების ამორჩევით შეკრიბონ სასოფლო და სამაზრო გარდასახადი და იზრუნონ იმ საჭიროების დაკმაყოფილებაზე, რომელიც აწევს სოფელს და მაზრას. ჩვენ გვსურს ავწეროთ აქ ის წესდება, რომელიც შეეხება სამაზრო საჭიროებების მმართვეას, საზოგადოებისაგან ამორჩეული პირების ხელით.

– 11 –

IV

რაზე უნდა იზრუნოს ერობამ?

«ერობაზე წესდების» მეორე მუხლი აი რა და რა საქმეებზე ზრუნვას ანდობს ერობის-ამორჩეულ პირებს:

- 1) ერობის ქონების, კაპიტალის და შეკრებილი ფულის მმართვეა;
- 2) აშენება და შენახვა შენობების, რომელნიც ერობას ეკუთვნიან, და იმ გზების, რომელნიც მის ხარჯით უნდა ინახებოდენ;
- 3) ზრუნვა ხალხის სიშიმშილისგან დამცველ ღონისძიებებზე;
- 4) მმართვეა ერობის ქველის მოქმედი განწყობილებისა (სავაჭარო, საღარიბო, მოხუცებულების შემფარველი სახლებისა და სხვ.) ღონისძიება მათხოვრობის მოსასპობლათ, ზრუნვა ეკლესიების გაშენებაზე;
- 5) მმართვეა იმ საქმეებისა, რომელნიც შეეხებიან ურთიერთის საშუალებით ცეცხლის ზიანის მოსპობას;
- 6) ზრუნვა ადგილობრივი ვაჭრობის და წარმოების გავრცელებაზე;
- 7) წილის მიღება (განსაკუთრებით შემოსავალ-გასავალში, და კანონით დაწესებულ სამზღვრებში), ზრუნვაში სახალხო განათლებაზე, სახალხო სიმრთელეზე და საპყრობილეებზე.
- 8) დახმარება პირუტყვის ჭირის დასწრობაში და პურის, ან სხვა მცენარეების დაცვაში სხვა და სხვა სავნებელი ფრინველებისგან და პირუტყვებისგან;

– 12 –

9) აღსრულება იმ მოთხოვნილებების სამოქალაქო და სამხედრო მთავრობისა, რომელიც კანონით ერობამ უნდა გარდაიხადოს და მონაწილეობა ფოჩტის გარდასახადში;

10) განაწილება იმ სახელმწიფო ფულის გარდასახადისა, რომლის განაწილება გუბერნიებს და უეზდებს შუა მიენდობა ერობას, თანახმად ამ საგანზე გამოცემული კანონების ან ცალკე განკარგულების, დამტკიცე-

ბულის ხელმწიფე იმპერატორისაგან;

11) დანიშვნა, განაწილება, მოკრეფა და დახარჯვა, «საერობო გარდასახადის წესდების» თანახმად, ადგილობრივი გარდასახადისა, გუბერნიის ან უეზდის საერობო მოთხოვნილებების დასაკმაყოფილებლათ;

12) წარდგენა უმაღლეს მართველობასთან, გუბერნიის მთავრობის საშუალებით, ცნობების და აზრისა იმ საგნებზე, რომელნიც შეეხებიან გუბერნიის ანუ უეზდის ადგილობრივ სარგებლობას და საჭიროებას, და თხოვნა ამ საგნებზე, ეგრეთვე გუბერნიის მთავრობის საშუალებით. წარდგენა, უმაღლესი მმართველობის ან გუბერნიის მმართველის მოთხოვნაზე, იმ ცნობების, რომელნიც შეეხებიან საერობო პატრონობას;

13) კენჭის ყრა სხვა და სხვა პირების ამოსარჩევათ საერობო სამმართველოებში და დანიშვნა ფულების ამ სამართველოებისთვის;

14) ის საქმეები, რომელნიც მიენდებოდა ერობას

– 13 –

თანახმათ ცალკე კანონების, წესდებების და განკარგულებებისა.

V.

ერობის კრება და გამგეობა

ყოველ უეზდში უნდა იკრიბებოდეს, წელიწადში ერთხელ, ოქტომბრამდი, უეზდის საერობო კრება (уездное земское собрание), რომელიც შესდგება ამორჩეულ პირებისგან. იმათი რიცხვი სხვა და სხვა უეზდებში სხვა და სხვაა, და დამოკიდებულია იმაზე, თუ რამდენი პირია უეზდში იმისთანა, რომელსაც დეპუტატების ამორჩევის უფლება აქვს.

ეს კრება გაგრძელდება ათი დღე.

დანარჩენ დროს საერობო საქმეს მმართავს უეზდის საერობო გამგეობა (уездная земская управа), რომელსაც ამორჩევენ ამ საგნისთვის საერობო კრება, და რომელიც შესდგება, სამი პირიდგან – ექვსამდე.

ყოველ გუბერნიაში უნდა იკრიბებოდეს, აგრეთვე წელიწადში ერთხელ, იანვრამდი, გუბერნიის საერობო კრება (губернское земское собрание), რომელიც შემდგარია უეზდების კრებისგან ამორჩეული დეპუტატებისაგან. ეს კრება გრძელდება ოცი დღე.

დანარჩენ დროს გუბერნიის საერობო საქმეებს მმარ-

– 14 –

თავს გუბერნიის კრებისაგან ამორჩეული გუბერნიის საეროზო გ ა მ გ ე ო ბ ა (губернская земская управа).

თუ ვინიცობაა უეზდის კრებამ ათ დღეში, და გუბერნიისამ ოც დღეში თავიანთი საქმეები ვერ მოასრულეს, მათი თხოვნით შეიძლება ვადის გაგრძელება: უეზდის კრების გაგრძელება შეუძლია გუბერნატორს, და გუბერნიისა – შინაგანი საქმეების მინისტრს. ამავე მინისტრს ნება აქვს დანიშნოს კრება უდროო დროსაც, როცა ამას საჭიროება მოითხოვს.

უეზდის და გუბერნიის გამგეობა კი მუდამ უნდა მოქმედებდეს.

კრების წევრებს არც ჯამაგირი ეძლევათ, არც ჯილდო, მაგრამ კრებას შეუძლია შესაფერი ჯამაგირი და ჯილდოც დაუნიშნოს უეზდის და გუბერნიის გამგეობის წევრებს.

უეზდის და გუბერნიის კრებაში თავ-მჯდომარეთ, საზოგადოთ, უეზდის და გუბერნიის მარშლები არიან – გამგეობებში კი თავ-მჯდომარეს ნიშნავს თვითონ კრება, რომელიც ირჩევს გამგეობას..

VI

ამომრჩევლები და ამორჩეულები

ერობის კრებას შეადგენენ სამ გვარი დეპუტატები:

1) ადგილობრივი მამულის მეპატრონეების ამონარჩევნი;

– 15 –

2) ქალაქების საზოგადოებისგან ამორჩეულნი;

და 3) გლეხ-კაცების საზოგადოების ამონარჩევნი.

ამორჩეულ პირათ შეუძლია იყვეს ყოველი პირი, რომელსაც კი ამორჩევის დროს კენჭი აქვს.

კენჭი არ ერგება შემდეგ პირებს: ვინც ოცდა ხუთ წელზე ნაკლებია ხანით; ვინც სისხლის სამართალში იმყოფება; ვინც საზოგადოებისაგან გამორიცხული არის, და ვისაც ქვეშე ვრდომლობის ფიცი არ მიუღია.

კენჭი ერგება, თუ ზემოხსენებული დაბრკოლება არ ექნათ, შემდეგ პირებს:

მამულის მეპატრონეებთაგან:

1) ვისაც უეზდში აქვს საკუთარი მამული დაწესებული სივრცის (ყოველ უეზდისთვის ცალკე ზომაა დაწესებული, 200 დესეტინიდან დაწყებული 800 და მეტიც; რაც უფრო ძვირობს რომელიმე უეზდში მიწა-წყალი, მით უფრო ნაკლებს ზომას თხოულობს კანონი);

2) ვისაც აგრეთვე უეზდში სხვა რამე უძრავი ქონება აქვს, ან გამართულება, ქარხანა, და სხვ., ღირებულებით თხუთმეტი ათასს მანეთით მაინც;

2) ვისაც ზემოხსენებულ ზომაზე ნაკლები მამული აქვთ უეზდში, მაგრამ ამ ზომის მეთორმეტედი კი მაინც, იმათ შეუძლიანთ ერთათ შეიკრიბონ, და ერთი კენჭი იქონიონ.

– 16 –

ქალაქების საზოგადოებისაგან:

1) ვისაც სავაჭრო მოწმობა აქვს;

2) ვისაც ქალაქის მიწაზე ქარხანა, ფაბრიკა ან სხვა გაწყობილება აქვს, მწარმოებელი, ან სავაჭრო, რომლის აღებ-მიცემა წელიწადში ექვსი ათას მანეთს მაინც შეადგენს;

3) ვისაც ქალაქის მიწაზე უძრავი საკუთრება აქვს, დაფასებული: იმ ქალაქებში, სადაც ათი ათას კაცზე მეტი სცხოვრობს – სამი ათას მანეთით მაინც; სადაც ორი ათასიდგან ათი ათასამდე კაცი ცხოვრობს ათას მანეთით მაინც, და ყველა დანარჩენ ქალაქებში – ხუთას მანეთით.

სოფლის მცხოვრებლებისაგან:

ყოველი სოფლის საზოგადოება ირჩევს თავის წრისგან სანდო პირებს, და როცა სხვა-და-სხვა სოფლებისგან ამორჩეული სანდო პირები იკრიბებიან, ისინი თავიანთი მხრით ირჩევენ დეპუტატებს საეროზო კრებაში.

საეროზო კრებაში ამორჩეულ დეპუტატს კანონი ამლევს სახელათ «ხ მ ო ვ ა ნ ი» (Гласный). ეს სახელი ჰქვია ყველა წევრებს, როგორც უეზდის, აგრეთვე გუბერნიის კრებისას. ხმოვანების რიცხვი თითოეული გუბერნიის და უეზდისთვის ინიშნება უმაღლესი მმართველობის გადაწყვეტილებაში, იმავე დროს, როცა გამოდის ეროზის დაწესების ბრძანება.

– 17 –

VII

ეროზის უფლება და მოქმედება.

ეროზას მინიჭებული აქვს თითქმის სრული უფლება ადგილობრივი შინაური გამგეობისა. კანონი თვითონ იხსენიებს იმ ორიოდე საგანს, როცა ეროზის გადაწყვეტილებას ეჭირება გუბერნატორის ან შინაგანი საქმეების მინისტრის ნების დართვა. დანარჩენ საქმეებში ეროზა სრული მეუფეა თავისი მოაზრების და მოქმედების,

რასაკვირველია კანონიერ კალაპოტში.

ვინიცობაა თუ გუბერნატორი წინააღმდეგი გახდა ერობის რომელიმე გარდაწყვეტილებისა, იმან უნდა დაუბრუნოს ერობას მისი გადაწყვეტილება, და წინა დაუდოს მისი ხელახლავ განხილვა. თუ ერობა ხელ-მეორეთ უწინდელ გადაწყვეტილებას დაადგა, მაშინ ეს გარდაწყვეტილება აღსრულებაში უნდა მოიყვანონ და გუბერნატორს მისი დაბრკოლება არ შეუძლია, თუ მეტის მეტი შესანიშნავი შემთხვევა არ იქნა. მხოლოდ ამ შემთხვევაში იმას შეუძლია თავისი საკუთარი პასუხის-გების ქვეშ შეაჩეროს ერობის გადაწყვეტილების სისრულეში მოყვანა და წარუდგინოს საქმე სენატს. – სწორეთ იმნაირათვე უნდა მოიქცეს შინაგანი საქმეების მინისტრი, როცა ის რასმეში ვერ დაეთანხმება ერობას.

აქედან ნათლათ სჩანს, რომ ერობას შეუძლია მოქმედება; იმას ბევრათ უფრო მეტი უფლება აქვს, ვინემ უწინდელ დეკრეტებს და სხვ. ამ უფლებას ჩვენ უფრო

– 18 –

კარგათ მაშინ დავაფასებთ, როცა მოვიხსენიებთ, რომ ერობას შეუძლია გუბერნის ან უეზდის სახელით ვალი აიღოს, შეუძლია ბანკის დაარსება, რკინის გზების გამართვა თავის საკუთრებათ, ან აქციების გამოცემით, შეუძლია გამოსცეს წესდება და სხვა და სხვა სახელმძღვანელო დარიგება ერობის სამსახურის ასრულებაზე, შეუძლია მიაწვინოს უმაღლეს მმართველობამდი თავისი სურვილი და მოაზრება ადგილობრივ მდგომარეობაზე და საზოგადოთ ყველა იმ ღონისძიებებზე, რომელნიც მისთვის მიცემულ უფლებას გადააჭარბებენ.

ყველა ადვილათ მიხვდება, რომ ჩვენ მდგომარეობაში ყველა ეს უფლებები ძლიერ შესანიშნავი და სანდომი არიან. და ეს მათი ღირსება ჩვენ თვალში უფრო გადიდება, როცა ჩვენ გავიხსენებთ, რომ ერობის ყველაზე უფრო უძვირფასესი ღირსება ის არის, რომ ჩვენ საკუთარ საქმეს ჩვენვე გვაველევიანებს, ჩვენ პატრონათ ჩვენვე გვხდის და ეს გარემოება, მარტო ეს, – ეს ჩვენ არასოდეს არ უნდა დავივიწყოთ! – გვამაღლებს კაცების ხარისხზე, ადამიანის ღირსებას გვაძლევს და გვაჩვენებს უმჯობეს, კაცურ ცხოვრებას.

VIII

ერობის გავლენა რუსეთში.

როგორც წინეთ იყო ნათქვამი, ჯერ ექვსი წელიწად-

დიც არ არის, რაც ერობა შემოღებულია რუსეთში;

– 19 –

ზოგიერთ გუბერნიებში ის მარტო შარშან და შარშან-წინ შემოიღეს, ზოგიერთებში კი ჯერაც შემოღებული არ არის. მაგრამ ამ მოკლე ხანშიაც აღმოჩნდა, რომ ეს დაწესებულება მეტის მეტათ სასარგებლოა საზოგადოებისთვის, თუ თვითონ ეს საზოგადოება წინ დახედვით და გონიერად ირჩევს თავის წარმომადგენლებს ხეირიანი კაცების ხელში, როგორც გვიჩვენებს რუსეთის მაგალითი, ერობა ხალხის გამბედნიერებელია, მართალია, იმ ზომით კი არა, როგორითაც შეიძლება ამისი სურვა, მაგრამ შესამჩნევად კი მაინც.

ჯერ ერთი ეს, რომ უწინდელ დროში რუსეთში ერობის გარდასახადი იკრიბებოდა და იხარჯებოდა უგზო-უკვლოდ, დაუზოგველათ. – არავის არ ეკითხებოდა, მართლა ამდენი უნდა გარდიხადოს მაზრამ, თუ ნაკლები; არავის იმის დარდი არ ჰქონდა, რომ ცოტადენი რამ მაინც მოერჩინა დახარჯვისაგან. და ის პირები, რომელთაც ერობის ფული და საქმეები მთავრობისგან მიბარებული ჰქონდათ, გაუკითხავათ აკმაყოფილებდნენ ყოველ-ნაირ მოთხოვნილებას, რომელსაც კი წარმოადგენდა სამოქალაქო ან სამხედრო ნაწილის მთავრობა. და თუმცა ხარჯი დიდი და უზომო იყო, თუმცა გარდასახადის მოკრება თითქმის ნიადაგი იყო, მაზრის კეთილ-დღეობას ამისგან არაფერი ხეირი არ ეტყობოდა: საავადმყოფოები, სასწავლებლები, პურის მაღაზიები, გზები და სხვა სასარგებლო საგნები მეტის-მეტათ სუსტ მდგომარეო-

– 20 –

ბაში იყვნენ; სასოფლო და სამაზრო ბანკებზე, საექიმო ნაწილის ხეირიანათ გაწყობაზე, ფულების შეგროვებაზე სხვა და სხვა საჭიროებისათვის, ხომ არავის სიზმარშიაც არ მოსჩვენებია და ყოველი კერძო პირი დასცქეროდა ამ სამწუხარო მდგომარეობას გულ გრილათ და უნებურათ, თითქო ეს საქმე თვითონ იმას და მის მახლობლებს არ შეეხებოდა...

ეხლანდელ მდგომარეობაში კი ჩვენ სულ სხვა ნაირ, უფრო სასიამოვნო სურათებს ვხედავთ. ჯერ ერთი ეს, რომ გარდასახადს რომ იხდის ხალხი, იტყობს მაინც, თუ რაში და რისთვის იხდის, სად და ვის სასარგებლოთ მიდის ის ფული, იცის მაინც, რომ მის ფულის დახარჯვაში ხმა და გავლენა ექნება მის ამორჩეულებს, ესე იგი თვითონ იმას. ამას გარდა, საზოგადოებას შეუძლია იმ რიგათ იხარჯოს შეკრებილი ფული, რომ ამითი დააკმაყოფილოს თავისი უპირველესი საჭიროებები, გზა გაუხსნას თავის შრომას, ხეირიანათ აღზარდოს თავისი

შვილები და სხვ. – რუსეთში, მაგალითად, ერობის ხელშია უთვალავი სახალხო შკოლები, რომლის გამართვას აუვიდა უწინდელ ზომაზე შეკრებილი საერობო გარდასახადი. ეს შკოლები იმ რიგათ არიან განწყობილნი, როგორც მოუნდომებია თვითონ ერობას და მათში ასწავლიან ერობისგან მოძებნილი და დაქირავებულნი მასწავლებლები. – შკოლებს გარდა, ერობას ზედამხედველობა აქვს სახალხო პურის მალაზიებზე, რომლის

– 21 –

დანიშნულება ისაა, რომ შიმშილის, ან პურის ნაკლებუვანების დროს ხელი გაუწყოს გაჭირვებულ ხალხს და ასესხოს იმას დასათესი მარცვალი ან საჭმელი პური. შიმშილის დროს ერობას სხვა უფლებაც აქვს: იმას შეუძლია მიიღოს შინაგანი საქმეების სამინისტროდან ნაღდი ფული იმ ფონდიდან, რომელიც დანიშნულია დამშეულების დასახმარებლათ; ნება აქვს იყიდოს სადაც მოუხდება იმ ფულით პური, და გასცეს ის სესხათ თავის მაზრის მცხოვრებლებზე. როცა რუსეთში 1868 წ. შიმშილი იყო, ერობამ ამ ნაირი მოქმედებით ბევრ ალაგას მშვენიერი სახელიც დაიმსახურა და ჩინებული საქმეებიც მოახდინა.

ერობას ეკუთვნის, გზის გარდა, სახალხო სიმრთელეზე ზრუნვა. რუსეთში ერობა იმით ასრულებს ამ მოვალეობას, რომ იაფ ფასიან აფთიაქებს აწესებს დიდრონ სოფლებში და იქედან იაფათ აძლევს წამლებს შეუძლებელ მცხოვრებლებს, ღარიბებს კი სულ მუქთათ და უფასოთ ურიგებს. ამავე სოფლებში ერობას დაყენებული ჰყავს თავის ხარჯით ექიმები და ფერშლები, რომელნიც მოვალენი არიან უექიმონ უფასოთ ყველას, ვისაც კი იმათ მაზრაში და წრეში ექიმობა სჭირდება. რუსეთის ერობა ჩინებულათ და გონიერათ ირჩევს ექიმებს იმ ყმაწვილებში, რომელნიც ყოველ წელიწადს სწავლას ასრულებენ უნივერსიტეტებში და მედიკურ აკადემიაში, და მშვენიერათ სარგებლობს მათი ჯერ კიდევ დაუვიწყარი ცოდნით. –

– 22 –

მაგრამ ერობის მოქმედება მარტო ამ წვრილმანი საქმეებით როდი თავდება. რადგანც «ერობის წესდება» ერობას მაზრის პატრონობის გამგეობას აძლევს – რუსეთის ერობა სხვა და სხვა გუბერნიებში ჩინებულ ბანკებს აწესებს (საერობო ბანკებს), რომლის შემწეობით მალდება და ვრცელდება ადგილობრივი მეურნეობა და აღებმიცემა. რადგანაც ამ ბანკების დამფუძვნებელი და გამგებელი არის მთელი მაზრა, იმათ მეტი ნდობაც და უფლებაც აქვთ, და ამის გამო, თუმც მათ დასაწყისში ძლიერ

ცოტა ფული აქვთ, მაგრამ მათი ალებ-მიცემა რამდენიმე მილიონამდე აწევს, და მათი სარგებლობა და ხეირი ორ-ჯერ-სამჯერ, ხანდისხან მეტჯერაც აჭარბებს წინ დაწინ გამოღებულ საბანკო ფულს. ზოგიერთი საერო ბანკების მოქმედება ისე საგანგებო და ჩინებულია, რომ ეხლა მთელ რუსეთს ისინი მაგალითად აქვს მიღებული. ამ ნაირია, მაგალითად, ხერსონის საერო ბანკი, რომელმაც სული ჩაუდგა ხერსონის ადგილის მეპატრონეებს და მცხოვრებლებს.

საერო ბანკის გაწყობაზე აქ ჩვენ ბევრს არას ვიტყვით, ამიტომ, რომ ამ მოკლე ხანში ამ საგანზე ცალკე წიგნის დაბეჭდვას ვაპირებთ, შესახებ ჩვენი ბანკებისა.

რუსეთის ერობამ ერთ საქმეში კიდევ ისახელა თავი: რაკი ის ხედავდა, რომ რომელიმე მაზრის კეთილდღეობა და სარგებლობა იმაზეა დამყარებული, გადის თუ

– 23 –

არა იმ მაზრაში რკინის გზა და აქვს თუ არა მაზრას ხეირიანი გზები, ადგილობრივი ნაწარმოების გასაზიდველათ, და რაკი ერობა ხედავდა, რომ არც რკინის და არც უბრალოდ გზები ზეციდან დამზადებული არ ცვინდებოდნენ მაზრაში, იმან იკისრა ერობის ხარჯით გზების გავლება, როგორც უბრალოების, ეგრეთვე რკინისა. რასაკვირველია, რომ, ჩვენში არ იყოს, ამ საქმისთვის რუსეთის ერობას საკმაო ფული არ მოეძიებოდა. მაგრამ, რადგანაც კანონი იმას საერო გადასახადის მოხმარების უფლებას აძლევს, ერობამ აი როგორი უბრალო და გონიერი ოსტატობა იხმარა, რკინის გზის გასავლებათ. იმან გამოძებნა ფულის პატრონები, და უთხრა მათ: გავლეთ ამ ქალაქიდგან ამა და ამამდე რკინის გზა, და ამუშავეთ თქვენთვის ამდენი და ამდენი წლის განმავლობაში; მოგვეცით ჩვენ მაშინ ანგარიში, და თუ ამ გზამ თქვენ სარგებლობა არ მოგცესთ, ჩვენ, ერობა, მოვალე ვიქნებით შეგისვით თქვენი სარგებელი ისე, რომ თქვენგან დახარჯულ ფულებზე წელიწადში ხუთი პროცენტი შემოგდიოდესთ. – ამისთანა გარანტიას ძლიერ ხშირათ აძლევს თვითონ მართებლობაც; ერობამ ამ გარანტიის მიცემით ძლიერ ბევრ ფულის პატრონებს გააბედვინა რკინის გზის გაშენება იმისთანა ადგილებში, სადაც უიმისოთ თავის დღემიაც არ გაშენდებოდა რკინის გზა. და რადგანაც გზები შემოსავლიანი გამოდგენ და გამშენებლებს საკმაო სარგებელი მისცენ, ერობას თითქმის არ-

– 24 –

სად ფულის გამოღება არ დასჭირდა, დაპირებული სარგებლის შესავსებლათ.

ზოგ ალაგას, ერობა თვითონაც შეუდგა რკინის გზის შენებას, ან და მმართველობისგან გზის გაშენების ნებ(კონცესია) აიღო, და მერმე გაყიდა ეს კონცესია ფულის პატრონებზე. ანა და კიდევ რკინის გზის მშენებლების ამხანაგათაც გახდა. ერთი სიტყვით, რუსეთში ერობამ თავი გამოიჩინა, უმეტეს ნაწილათ, როგორც ხეირიანმა და გონიერმა მეპატრონემ, რომელიც კეთილსინდისიანათ და მოხერხებით ცდილობს და კიდევ ახერხებს ხალხის დასახნას ორი მისი საგანგებო და სანიაღვრო მტრისგან: სიღარიბისგან და უმეცრებისგან.

IX.

დასკვნის მაგიერ.

მაშ, იმედი ვიქონიოთ, რომ როცა ჩვენ ქვეყანასაც ეღირსება ერობის დაწესება და, როცა საერობო საქმეების მმართვეთა თვითონ ჩვენ ხელში გადმოგვეცემა, ჩვენი საზოგადოებაც იმნაირივე სარგებლობას გამოიტანს ამ დაწესებისაგან, და იმნაირივე გონიერებით მოიხმარს იმას, როგორც რუსეთის საზოგადოება. ერობის დაწესებამდი რუსული საზოგადოება ეხლანდელ ჩვენ საზოგადოებაზე უფრო წინ არ იდგა; ის მაშინ ყველას იმნაირივე მოუხერხებელ და გაუნათლებელ საზოგადოებათ მიაჩნდათ, როგორათაც ეხლა სთვლიან ჩვენ საზოგადოებას. – როგორც ყოველგან, ამ საქმეშიაც ვიიმედოთ, დამტკიცდება, რომ მოხერხება და განათლება მოსდევს სიმართლეების გავრცელებას, და არა წინ უსწრებს მას.